



Broj: 01-50-1-54-51/05.  
Sarajevo, 18. februara 2005.

## ZAPISNIK

52. sjednice Predstavničkog doma  
Parlamentarne skupštine Bosne i Hercegovine,  
održane 18. februara 2005. godine

Sjednica je počela u 10,05 sati. Prisustvovalo je 36 poslanika. Odsustvo su opravdali: Azra Hadžiahmetović, Filip Andrić, Selim Bešlagić, Mladen Potočnik, Ibrahim Đedović i Elmir Jahić.

Iz Vijeća ministara BiH sjednici su prisustvovali ministar Nikola Radovanović i zamjenik ministra Haris Bašić.

Sjednicu su pratili Maja Ribar i Sanja Stanojević – OHR i Mirsad Žiga – američka ambasada.

U uvodnim napomenama predsjedavajući Doma Šefik Džaferović obrazložio je izmjene i dopune prijedloga dnevnog reda u odnosu na prijedlog koji su poslanici dobili u pozivu za sjednicu.

U raspravi povodom prijedloga dnevnog reda učestvovali su: Zlatko Lagumdžija, Jozo Križanović, Milorad Živković, Seada Palavrić, Ljiljana Milićević, Momčilo Novaković, Hazim Felić, Vinko Zorić, Ivo Miro Jović, Nikola Špirić, Sead Avdić, Petar Kunić, Mirsad Ćeman i Beriz Belkić. Sekretar Doma Branka Todorović objasnila je odredbe Poslovnika, vezano za prijedlog Zlatka Lagumdžije da se u dnevni red uvrsti donošenje zaključka o obustavljanju procedure o Prijedlogu zakona o pravima i dužnostima članova Parlamentarne skupštine BiH, u skladu s Rezolucijom, usvojenom na Domu 8. septembra 2004. godine.

Poslije rasprave predsjedavajući je na glasanje dao prijedloge za dopunu dnevnog reda, koje su iznijeli Zlatko Lagumdžija, Jozo Križanović, Milorad Živković i Petar Kunić.

Prijedlog **Zlatka Lagumdžije – da se u dnevni red, kao 3. tačka, uvrsti donošenje zaključka o obustavljanju procedure o Prijedlogu zakona o pravima i dužnostima članova Parlamentarne skupštine** – nije usvojen. Za prijedlog je glasalo 6, protiv 22, uzdržalo se 7 poslanika.

Dom je usvojio drugi prijedlog Zlatka Lagumdžije – **da se u dnevni red, kao 12. tačka, uvrsti informacija Vijeća ministara o realizaciji zaključka o pripremi dopuna Zakona o akcizama – koje su trebale biti pripremljene do 31. januara 2005. godine.** Za ovaj prijedlog glasalo je 19, protiv 8, uzdržalo se 8 poslanika.

**Jozo Križanović** predložio je da se u dnevni red uvrsti inicijativa koju je on podnio 14. februara – **da se osnuje komisija za utvrđivanje teksta himne Bosne i Hercegovine.** Stavljajući ovaj prijedlog na glasanje, predsjedavajući Džaferović upoznao je Dom da je Kolegij na jutrošnjoj sjednici raspravljao o ovoj inicijativi i odlučio da je prethodno uputi na raspravu Ustavnompravnoj komisiji, nakon čega bi išla na Dom.

Prijedlog nije usvojen – za je glasalo 11, protiv 18, uzdržalo se 5 poslanika.

Dalje se Dom izjasnio o prijedlogu **Milorada Živkovića – da se u dnevni red uvrsti informacija Ministarstva odbrane o inspekciji izvršenoj u Kasarni kod Han-Pijeska.**

I uz ovaj prijedlog predsjedavajući Doma kazao je da Dom nije dobio pisanu informaciju, te podsjetio na izlaganje ministra odbrane na prošloj sjednici Doma, koji je rekao da je rok za sačinjavanje informacije 14. februar i da će tada informacija biti dostavljena Vijeću ministara, a po usvajanju na Vijeću ministara, bit će dostavljena Parlamentarnoj skupštini. Naglasio je da informacija Domu još nije dostavljena, pa je prijedlog dao na glasanje.

Prijedlog je usvojen. Za su glasala 23, protiv 6, uzdržalo se 6 poslanika.

Na kraju, Dom se izjasnio o prijedlogu **Petra Kunića – da se u dnevni red uvrsti Prijedlog zaključka o osiguranju direktnog TV prijenosa sjednica Doma.**

Ovaj prijedlog također je usvojen. Za je glasalo 27, 3 protiv i 5 poslanika se uzdržalo.

Pošto se glasalo o svim prijedlozima za dopunu dnevnog reda, predsjedavajući Doma konstatirao je da 52. sjednica ima sljedeći

## D N E V N I R E D

1. Zapisnik 51. sjednice Doma,
2. Poslanička pitanja i odgovori,
3. Zahatjev Vijeća ministara za razmatranje Prijedloga zakona o Javnom radio-televizijskom sistemu BiH po hitnom postupku, u skladu s članom 104. Poslovnika,
4. Zahtjev Vijeća ministara za razmatranje Prijedloga zakona o Službi za poslove sa strancima po hitnom postupku, u skladu s članom 104. Poslovnika,
5. Zahtjev Vijeća ministara za razmatranje Prijedloga zakona o izmjenama i dopunama Zakona o namjeni i korištenju dijela imovine koju je BiH dobila po Sporazumu o pitanju sukcesije po hitnom postupku, u skladu s članom 104. Poslovnika,
6. Zahtjev Vijeća ministara za razmatranje Prijedloga zakona o izmjenama i dopunama Zakona o javnim nabavkama po hitnom postupku, u skladu s članom 105. Poslovnika,
7. Prijedlog zakona o poštama Bosne i Hercegovine (drugo čitanje),
8. Prijedlog zakona o izmjenama i dopunama Zakona o krivičnom postupku BiH (prvo čitanje),
9. Prijedlog zakona o izvršenju krivičnih sankcija, pritvora i drugih mjera BiH (prvo čitanje),
10. Izvještaj Zajedničke komisije o nastojanju za postizanje sporazuma o identičnom tekstu Zakona o izmjenama i dopunama Zakona o Centralnoj banci BiH,
11. Razmatranje:
  - a) Informacije o svim aktuelnim i budućim misijama pripadnika Oružanih snaga BiH, sa Izvještajem Zajedničke komisije za odbrambenu i sigurnosnu politiku,
  - b) Informacije o učešću policijskih službenika u mirovnim misijama, sa Izvještajem Zajedničke komisije za odbrambenu i sigurnosnu politiku,
12. Informacija Vijeća ministara o realizaciji Zaključka Doma o izmjenama i dopunama Zakona o akcizama (koji je trebalo pripremiti do 31.1.2005.),
13. Izvještaj o reviziji Agencije za rad i zapošljavanje, sa Izvještajem Komisije za finansije i budžet,
14. Informacija Ministarstva odbrane o provedenoj inspekciji Kasarne u Han-Pijesku i eventualoj umiješanosti vojnih lica u skrivanje optuženih za ratne zločine,
15. Izvještaj Komisije za ljudska prava, imigraciju, izbjeglice i azil o posjeti poslanika Parlamentarne skupštine BiH Međunarodnom krivičnom sudu za ratne zločine počinjene na području bivše Jugoslavije,
16. Prijedlog zaključka o osnivanju Istražne komisije za utvrđivanje stepena radijacije osiromašenim uranom i posljedica na zdravlje građana u BiH (Hadžići, Han-Pijesak, Bratunac, Majevica i druge lokacije),
17. Davanje saglasnosti za ratifikaciju:
  - a) Evropske konvencije o obeštećenju žrtava krivičnih djela nasilja,
  - b) Evropske konvencije o prijenosu postupanja u krivičnim stvarima,

- c) Evropske konvencije o međusobnom pružanju pravne pomoći u krivičnim stvarima,
  - d) Konzularne konvencije između Bosne i Hercegovine i Republike Turske i
  - e) Sporazuma između Vijeća ministara BiH i Vlade Republike Italije o uzajamnom reguliranju međunarodnog drumskog prijevoza putnika i tereta,
18. Prijedlog zaključka Petra Kunića o osiguranju direktnog TV prijenosa sjednica Doma.

#### **Ad – 1:** Zapisnik 51. sjednice Doma

Jozo Križanović imao je intervenciju, da na 2. strani, u njegovom poslaničkom pitanju, umjesto “institucijama i posjednicima” treba da stoji “institucijama i pojedincima”.

S ovom primjedbom Zapisnik 51. sjednice usvojen je sa 30 glasova za i jednim protiv.

#### **Ad – 2:** Poslanička pitanja i odgovori

Predsjedavajući Džaferović konstatirao je da je Adem Huskić dobio odgovor od Obavještajno-sigurnosne agencije na pitanje postavljeno na 51. sjednici.

Postavljena su sljedeća nova pitanja:

##### **Hazim Felić:**

«Da li Vijeće ministara šta čini, a ako ne, kada će uzeti u razmatranje zahtjev penzionera, državljana BiH, koji su svoje penzije ostvarili u Republici Sloveniji, te ih zaštititi, s obzirom da ne mogu ostvariti pravo na zdravstvenu zaštitu niti u BiH niti u Republici Sloveniji, a odskoro im je uveden i porez na penziju od 18 do 30%?»

##### **Beriz Belkić:**

«Da li je Ministarstvo za ljudska prava i izbjeglice ili neka druga institucija Bosne i Hercegovine u posjedu izvještaja Evropske komisije za borbu protiv rasizma, odnosno etničke i vjerske diskriminacije koji su naročito izraženi u oblasti obrazovanja, zapošljavanja, rješavanja stambenih problema i zdravstva?

Ima li se namjera, ako posjeduju taj izvještaj, s njegovim sadržajem upoznati zakonodavnu i izvršnu vlast i kakve se mjere namjeravaju poduzeti da se eliminiraju ovi najcrnji oblici kršenja ljudskih prava?»

##### **Ivo Miro Jović:**

«Ja sam u prilici da postavim pitanje Federalnom zavodu za zapošljavanje i Agenciji za rad i zapošljavanje Bosne i Hercegovine.

Ove dvije institucije su namjenski osnovane za obavljanje određenih djelatnosti u oblasti rada i zapošljavanja i sigurno da se ogroman finansijski kapital tamo odlijeva ili raspoređuje. Po mojim saznanjima, u Federalnom zavodu rade 62 zaposlena od čega je jedan hrvatske nacionalnosti!!! Zato pitam ove dvije institucije:

- Kakva je nacionalna struktura ove dvije institucije i kada će se to promijeniti?»

##### **Milorad Živković:**

“Evo već dvije godine spominjemo činjenicu da i ova institucija pitanja i odgovora ne funkcioniše iz jednostavnog razloga što nemamo nikoga iz ministarstava da tu sjedi i mnogo bi bilo jednostavnije da se samo jednom rečenicom odgovori na ova jednostavna pitanja.

Moje pitanje je upućeno Vijeću ministara, odnosno Institutu za standarde, mjeriteljstvo i intelektualno vlasništvo:

- Koji su kriteriji za dodjeljivanje licence za provođenje Zakona o autorskim i srodnim pravima i ko je do sada dobio tu licencu?»

**Vinko Zorić:**

“Prije dvije ili tri sedmice postavio sam pitanje vezano za problematiku Lutrije Bosne i Hercegovine. Dobio sam odgovor s kojim, naravno, nisam zadovoljan i ponavljam pitanje koje glasi:

- Ko su članovi Upravnog odbora Lutrije Bosne i Hercegovine (njihova imena, prezimena, a ne nacionalnost i spol)?

- Koga je sve Lutrija Bosne i Hercegovine sponzorirala i kome je sve davala donacije u 2003. i 2004.?”

**Senija Kapetanović:**

“Moje pitanje odnosi se na Visoko sudsko i tužilačko vijeće Bosne i Hercegovine:

- Kako je Visoko sudsko i tužilačko vijeće BiH propustilo da ispoštuje nacionalnu zastupljenost kod imenovanja sudija i tužilaca u Prijedoru? Naime, u Prijedoru nije imenovan niti jedan sudija, kao ni tužilac iz reda bošnjačkog naroda.”

**Ivo Lozančić:**

“Razlog moje prijave za postavljanje pitanja je moj razgovor s dijelom posloводства Elektro-Bosne Jajce prije nekoliko mjeseci, koji su me tada molili da ovdje postavim pitanje vezano za pljačku i podastri su, navodno, i dokumentaciju s dokazima o izvršenoj pljački u Elektro-Bosni Jajce, a dodatni motiv je i zadnje pisanje dnevne i sedmične štampe o poduzeću Elektro-Bosna o izvršenoj pljački, gdje direktno predsjednik Upravnog odbora i direktor poduzeća i članovi nadzora optužuju za pljačku neku, navodno, fiktivnu firmu registriranu u Londonu koja je na prijevaru, bez ulaganja novca, postala većinski vlasnik uz pomoć ranijeg poslovnog odbora i opljačkala firmu Elektro-Bosna Jajce. Moje pitanje upućeno je Vijeću ministara i ono glasi:

- Šta čini Vijeće ministara BiH da prekine pljačku poduzeća Elektro-Bosna Jajce? Da li će im za polaznu osnovu poslužiti izjave predsjednika Upravnog odbora gosp. Mihalja, direktora gosp. P. Stanića i direktora gosp. Građinčića i šta će učiniti u desetinama sličnih ili identičnih slučajeva u oba entiteta gdje nisu reagirali nadležni u entitetima?”

**Dužanka Majkić:**

“Parlamentarna skupština Vijeća Evrope je, s ciljem eliminiranja svih oblika diskriminacije nad ženama i s ciljem promoviranja jednakosti, predložila da se u što kraćem roku na ovu temu povede javna rasprava u svim zemljama na svim vladama. U skladu s tim, upućujem konkretno pitanje Vijeću ministara, a ono se svodi na sljedeće:

- Šta je do sada urađeno na promoviranju jednakosti spolova u BiH, naročito sa aspekta primjene zakona o ravnopravnosti spolova?

- Dokle se došlo s donošenjem novih, izmjenom postojećih zakona radi usklađivanja s odredbama Zakona o ravnopravnosti spolova:

- Da li je konačno završena procedura oko uspostave Agencije za ravnopravnost spolova i da li je ona kadrovski i materijalno sposobna da djeluje u skladu s članom 23. Zakona o ravnopravnosti spolova?”

**Momčilo Novaković:**

“Koja je po redu bila vijest o izboru Vlade Republike Srpske na dnevniku Javnog televizijskog servisa BiH, odnosno BHTV 15. februara 2005. godine?

Ko je glavni i odgovorni urednik informativnog programa, a ko realizator te emisije?

Naime, interesantno je da građani BiH, a time i Republike Srpske, izdvajaju značajna sredstva, kako za finansiranje TVBiH, tako i entitetskih televizija, odnosno RTVRS i valjda je za tu televiziju izbor vlade vijest, posebno imajući u vidu svu problematiku koja je bila vezana za izbor te vlade.”

**Ruža Sopta:**

“Šta namjerava Vijeće ministara poduzeti u vezi s konkursom za dodjelu frekvencija za emitiranje RTV programa, odnosno TV kanala, koji je raspisala Regulatorna agencija (RAK)?

Naime, neshvatljivo je da taj konkurs ide prije i u najboljem slučaju uporedo s razmatranjem Zakona o JRTV sistemu BiH i koji će biti zaključen prije nego što se procedura završi.

Da li će Vijeće tražiti da se taj konkurs poništi ili produži do poslije usvajanja spomenutog zakona?”

**Selim Bešlagić:**

“Kada će Uprava za indirektno oporezivanje krenuti sa štampanjem i izdvanjem državnih administrativnih taksi?”

**Ad – 3:** Zahtjev Vijeća ministara za razmatranje Prijedloga zakona o Javnom radiotelevizijskom sistemu BiH po hitnom postupku, u skladu s članom 104. Poslovnika

U okviru ove tačke diskutirali su poslanici Kluba HDZ – Demokršćani Ivo Miro Jović, Vinko Zorić, Ruža Sopta i Martin Raguž. Svi su izrazili nezadovoljstvo sadržajem zakona, rekavši, između ostalog, da je diskriminirajući te da zaslužuje ne samo redovnu proceduru već i javnu raspravu.

Poslije rasprave predsjedavajući Doma zahtjev predlagača dao je na glasanje.

Za je glasalo 20, protiv 4, uzdržalo se 7 poslanika. Po entitetima, iz Republike Srpske za je glasalo 12, iz Federacije BiH 8 poslanika.

Kako nije bilo entitetske većine iz Federacije, proveden je postupak usaglašavanja u Komisiji Kolegija, gdje nije postignuta saglasnost. Zatim je izvršen drugi krug glasanja.

U drugom krugu glasanja iz Federacije BiH protiv je glasalo 7 poslanika, što nije 2/3, pa je predsjedavajući konstatirao da je usvojen zahtjev Vijeća ministara da se Prijedlog zakona o Javnom radiotelevizijskom sistemu razmatra po hitnom postupku, u skladu s članom 104. Poslovnika.

**Ad – 4. i 5.**

Dom je bez rasprave usvojio zahtjeve Vijeća ministara da se po članu 104. Poslovnika razmatraju:

- Prijedlog zakona o Službi za poslove sa strancima (za glasalo 30, protiv jedan, uzdržan jedan) i
- Prijedlog zakona o izmjenama i dopunama Zakona o namjeni i korištenju dijela imovine koju je BiH dobila po Sporazumu o pitanju sukcesije (za glasalo 30, protiv 3, uzdržan jedan).

**Ad – 6:** Zahtjev Vijeća ministara za razmatranje Prijedloga zakona o izmjenama i dopunama Zakona o javnim nabavkama po hitnom postupku, u skladu s članom 105. Poslovnika

Bez rasprave, Dom je usvojio zahtjev za hitni postupak, po članu 105. Poslovnika. Za zahtjev je glasalo 28 poslanika, protiv je glasao jedan, uzdržalo se 5 poslanika.

U raspravi o Prijedlogu zakona učestvovao je Jozo Križanović. Kazao je da je glasao protiv zahtjeva i da će glasati i protiv zakona, jer je došlo do probijanja roka za osnivanje Agencije za javne nabavke, a na sjednici čak nema nikoga od predlagača da objasni razloge zbog kojih rok nije ispoštovan.

Poslije ove diskusije, Dom je, sa 26 glasova za, 2 protiv i 5 uzdržanih, usvojio Zakon o izmjenama i dopunama Zakona o javnim nabavkama.

**Ad – 7:** Prijedlog zakona o poštama Bosne i Hercegovine (drugo čitanje)

U uvodnim napomenama predsjedavajući je, pored ostalog, rekao da je nadležna komisija usvojila 13 amandmana i da je u plenarnoj fazi tri amandmana na amandmane Komisije podnio Izet Hadžić.

U raspravi je učestvovao Milorad Živković, a zatim se Dom izjasnio o sva tri amandmana Izeta Hadžića.

Za Amandman I. glasalo je 16, protiv 16, uzdržala se 2 poslanika.

Za Amandman II. glasalo je 15, protiv 15, uzdržala se 2 poslanika

Za Amandman III. glasalo je 15, protiv 16, uzdržala se 2 poslanika.

Predsjedavajući je konstatirao da amandmani nisu usvojeni, pa je na glasanje dao Prijedlog zakona.

Za Prijedlog zakona glasao je 21, protiv 11, uzdržala su se 2 poslanika. Po entitetima, iz Federacije za je glasalo 8, iz RS 13.

Zbog nedostatka entitetske većine izvršeno je usaglašavanje u Komisiji Kolegija, pri čemu nije bilo saglasnosti, pa se prešlo na glasanje u drugom krugu.

U drugom krugu iz Federacije BiH protiv je glasalo 13, što je manje od 2/3.

Predsjedavajući je konstatirao da je u Predstavničkom domu usvojen Zakon o poštama Bosne i Hercegovine.

**Ad – 8:** Prijedlog zakona o izmjenama i dopunama Zakona o krivičnom postupku BiH (prvo čitanje)

Osnovne uvodne napomene o Prijedlogu zakona dao je predsjedavajući Džaferović. između ostalog, kazao je da je nadležna komisija podržala Prijedlog zakona u predloženom tekstu i da ni u komisijskoj fazi nije bilo amandmana.

Nije bilo rasprave, pa je Prijedlog zakona usvojen prvo u prvom čitanju – za su glasala 32, uzdržala su se 2 poslanika.

Sa 33 glasa za i jednim uzdržanim usvojen je prijedlog da se Prijedlog zakona razmatra i u drugom čitanju.

Ni u drugom čitanju nije bilo rasprave.

Dom je u predloženom tekstu usvojio Zakon o izmjenama i dopunama Zakona o krivičnom postupku. Za su glasala 33, a uzdržao se jedan poslanik.

**Ad – 9:** Prijedlog zakona o izvršenju krivičnih sankcija, pritvora i drugih mjera BiH (prvo čitanje)

U uvodnim napomenama predsjedavajući Džaferović rekao je da je nadležna komisija usvojila 37 amandmana, a da u plenarnoj fazi nema amandmana.

Nije bilo rasprave. Prijedlog zakona usvojen je u prvom čitanju sa 33 glasa za i jednim uzdržanim.

Usvojen je i prijedlog da se pređe odmah u drugo čitanje – za je glasalo 27, protiv 2, uzdržala su se 3 poslanika.

Nije bilo rasprave ni u drugom čitanju.

Sa 29 glasova za, jednim protiv i 2 uzdržana usvojen je Zakon o izvršenju krivičnih sankcija, pritvora i drugih mjera.

**Ad – 10:** Izvještaj Zajedničke komisije o nastojanju za postizanje sporazuma o identičnom tekstu Zakona o izmjenama i dopunama Zakona o Centralnoj banci BiH

Bez rasprave, Dom je usvojio Izvještaj Zajedničke komisije o nastojanju za postizanje sporazuma o identičnom tekstu Zakona o izmjenama i dopunama Zakona o Centralnoj banci Bosne i Hercegovine.

**Ad – 11:** Razmatranje:

- a) Informacije o svim aktuelnim i budućim misijama pripadnika Oružanih snaga BiH, sa Izvještajem Zajedničke komisije za odbrambenu i sigurnosnu politiku,
- b) Informacije o učešću policijskih službenika u mirovnim misijama, sa Izvještajem Zajedničke komisije za odbrambenu i sigurnosnu politiku.

U raspravi povodom predmetnih informacija učestvovali su: Beriz Belkić i Ivo Miro Jović. Predsjedavajući Džaferović skrenuo je pažnju da se informacije primaju k znanju, pa je Dom pozvao na izjašnjenje.

Sa 29 glasova za i 2 uzdržana Dom je primio k znanju informacije iz ove tačke dnevnog reda.

**Ad – 12:** Informacija Vijeća ministara o realizaciji Zaključka Doma o izmjenama i dopunama Zakona o akcizama (koji je trebalo pripremiti do 31.1.2005.)

U raspravi povodom ove tačke dnevnog reda učestvovali su: Zlatko Lagumdžija, Momčilo Novaković, Sead Avdić, Jozo Križanović, Seada Palavrić, Nenad Mišić, Vinko Zorić, Petar Kunić, Beriz Belkić i Ljiljana Milićević.

Nakon rasprave usvojen je sljedeći

**ZAKLJUČAK**

1. Pitanje izmjena i dopuna Zakona o akcizama Bosne i Hercegovine bit će tačka dnevnog reda na narednoj sjednici Predstavničkog doma.

2. Od Vijeća ministara traži se da dostavi pisanu informaciju u vezi s pripremama Prijedloga zakona o izmjenama i dopunama Zakona o akcizama Bosne i Hercegovine i da ovo pitanje smatra urgentnim za rješavanje.

**Ad – 13:** Izvještaj o reviziji Agencije za rad i zapošljavanje, sa Izvještajem Komisije za finansije i budžet

U okviru ove tačke diskutirali su: Beriz Belkić, Ruža Sopta, Ivo Miro Jović, Petar Kunić, Vinko Zorić i Sead Avdić.

Nakon rasprave, usvojen je sljedeći

**ZAKLJUČAK**

1. Usvaja se Izvještaj o reviziji Agencije za rad i zapošljavanje, kao i Izvještaj Komisije za finansije i budžet o razmatranju Izvještaja o reviziji, sa sljedećim preporukama:

- Hitno je potrebno provesti proceduru izbora direktora Agencije i uspostaviti Savjetodavni odbor,
- Okončati implementaciju zapisnika o preuzimanju imovine Zavoda za zapošljavanje BiH, te sačiniti početni bilans,
- Hitno riješiti status zatečenih finansijskih sredstava preuzetih od Zavoda za zapošljavanje BiH i utvrditi namjenu njihovog korištenja.

2. Traži se od Vijeća ministara da Predstavničkom domu podnese izvještaj o radu Agencije za rad i zapošljavanje u 2004. godini.

**Ad – 14:** Informacija Ministarstva odbrane o provedenoj inspekciji Kasarne u Han-Pijesku i eventualoj umiješanosti vojnih lica u skrivanje optuženih za ratne zločine

Predsjedavajući Džaferović u uvodu je rekao da je Dom ovu tačku uvrstio iako još informaciju nismo dobili. Ponovio je da je na prošloj sjednici ministar odbrane rekao da će informacija biti završena do 14. februara i da će je proslijediti Vijeću ministara, pa će tek kad prođe proceduru u Vijeću ministara biti dostavljena Domu. Konstatirao je da je sjednici prisutan ministar Radovanović, te ako ima nešto novo mimo ovoga što je on rekao, može uzeti riječ.

Ministar Radovanović složio se s konstatacijom predsjedavajućeg Doma, pa nije uzeo riječ.

Milorad Živković je u svojoj diskusiji, pored ostalog, izrazio žaljenje što se na ovakav način komunicira, pa je podsjetio na nespornost na prošloj sjednici, kada je od Ministarstva odbrane u toku sjednice stiglo obavještenje u vezi s Informacijom, te naglasio da se tačka ne bi ni tražila da je to stiglo dan ranije. Zapitao je da li i ovoga puta ima nespornosti, da li postoji pisana informacija i da li je i poslanici mogu dobiti, budući da mediji o tome već javljaju.

Još je diskutirao Momčilo Novaković, a zatim je ministar odbrane odgovorio na pitanja iz rasprave. Pored ostalog, rekao je da je Informacija 14. februara dostavljena Visokom predstavniku, Predsjedništvu BiH i Vijeću ministara BiH. Rekao je da jeste nespornost u činjenici koliko je vremena potrebno da materijal dođe od Ministarstva do Sekretarijata i da očekuje da će Informaciju Parlament dobiti u roku od sedam dana. Naglasio je da nema namjeru bilo šta skrivati iz tog materijala, a ono što se pojavilo u medijima je vrlo sažet dio izvještaja da bi se zadovoljio interes medija, rekao je, između ostalog, ministar odbrane Nikola Radovanović.

Predsjedavajući Doma zahvalio je ministru odbrane i kazao da će se Kolegij, kada Informacija stigne u Parlament, prema njoj odnositi u skladu s Poslovníkom, kao i prema svakom dokumentu koji se Parlamentu dostavi.

**Ad – 15:** Izvještaj Komisije za ljudska prava, imigraciju, izbjeglice i azil o posjeti poslanika Parlamentarne skupštine BiH Međunarodnom krivičnom sudu za ratne zločine počinjene na području bivše Jugoslavije

Miloš Jovanović govorio je u ime Komisije koja je posjetila Sud u Hagu, a zatim je vođena duža rasprava u kojoj su učestvovali: Beriz Belkić, Martin Raguž, Ruža Sopta, Šefik Džaferović, Ljiljana Milićević, Tihomir Gligorić, Sead Avdić, Vinko Zorić, Senija Kapetanović, Muhamed Moranjkić i Mirsad Čeman.

Sumirajući raspravu, predsjedavajući Džaferović predložio je da Dom usvoji sljedeći zaključak:

**Zadužuje se Komisija za ljudska prava, imigraciju, izbjeglice i azil da obavi konsultacije sa Ministarstvom pravde, Ministarstvom vanjskih poslova, Tužilaštvom i Sudom Bosne i Hercegovine, te da nakon toga, imajući u vidu i diskusiju koja je o Izvještaju vođena, Domu dostavi inovirani izvještaj.**

Prilikom glasanja prijedlog ovog zaključka nije dobio entitetsku većinu – za je glasalo 18, protiv 7, uzdržala su se 3 poslanika. Po entitetima, iz Federacije BiH za je glasalo 14, iz Republike Srpske 4.

Predsjedavajući je kazao da nije prisutan treći član Kolegija, pa će se usaglašavanje izvršiti naknadno.

**Ad – 16:** Prijedlog zaključka o osnivanju Istražne komisije za utvrđivanje stepena radijacije osiromašenim uranom i posljedica na zdravlje građana u BiH (Hadžići, Han-Pijesak, Bratunac, Majeveca i druge lokacije)

Prijedlog zaključka obrazložila je Jelina Đurković, kao predlagatelj.

U raspravi su učestvovali: Miloš Jovanović, Milorad Živković, Jelina Đurković, Abdulah Nakaš, Sead Avdić, Martin Raguž, Tihomir Gligorić, Muhamed Altić i Dušanka Majkić.

Prihvaćen je prijedlog iz rasprave da se u Prijedlogu zaključka briše tekst u zagradi (Hadžići, Han-Pijesak, Bratunac, Majeveca i druge lokacije), kao i da Komisija ima devet članova.

S ovim izmjenama usvojen je Zaključak o osnivanju Istražne komisije. Za je glasalo 26, uzdržala su se 2 poslanika.

Sa 27 glasova za i jednim uzdržanim u Istražnu komisiju izabrani su: Abdulah Nakaš, Vinko Zorić, Jelina Đurković, Ljiljana Milićević, Mehmed Suljkanović, Milorad Živković, Mubera Ušanović, Nadžida Mlaćo i Ivo Lozančić.

**Ad – 17:** Davanje saglasnosti za ratifikaciju:

- a. Evropske konvencije o obeštećenju žrtava krivičnih djela nasilja,
- b. Evropske konvencije o prijenosu postupanja u krivičnim stvarima,
- c. Evropske konvencije o međusobnom pružanju pravne pomoći u krivičnim stvarima,
- d. Konzularne konvencije između Bosne i Hercegovine i Republike Turske, i
- e. Sporazuma između Vijeća ministara BiH i Vlade Republike Italije o uzajamnom reguliranju međunarodnog drumskog prijevoza putnika i tereta.

U okviru ove tačke nije bilo rasprave, pa je Dom jednoglasno dao saglasnost za ratifikaciju navedenih akata.

**Ad – 18:** Prijedlog zaključka Petra Kunića o osiguranju direktnog TV prijenosa sjednica Doma

Takoder nije bilo rasprave o Prijedlogu zaključka Petra Kunića.

Dom je, sa 21 glasom za, 2 protiv i 2 uzdržana, usvojio Zaključak koji glasi:

“Poziva se Javni radiotelevizijski servis Bosne i Hercegovine da osigura tehničke uslove za direktan TV prijenos sjednica Predstavničkog doma Parlamentarne skupštine Bosne i Hercegovine.

Ovim je realiziran dnevni red 52. sjednice.

Sjednica je završena u 17,55 sati.

Sastavni dio Zapisnika je transkript 52. sjednice Predstavničkog doma.

SEKRETAR  
PREDSTAVNIČKOG DOMA  
**Branka Todorović**

PREDSJEDAVAJUĆI  
PREDSTAVNIČKOG DOMA  
**Šefik Džaferović**